



Zwergalserin

Rundbrief für Kinder

Nr. 12 ▪ Juni 2024



Vom 12. bis zum 28. Juli is wieda des Kaltenberger Ritterturnier.

Da Schnuffi Mankei, da Leo Löwe und da Imp hobn se vorher scho ammoi mit de Ritter beschäftigt. A ganz a intressants Thema, obwois scho recht lang her is!

Eana Hauptzeit hobn de Ritter ungefähr ab 500 nach Christus bis ungefähr 1500 nach Christus ghobt. Oiso ungefähr 1000 Jahr lang. Mittelalter hod ma de Zeit gnennt und aa bei uns in Bayern is sauber aufganga mit de Ritterschlachtn. Hoglbuachan warns de Rittersleid!


Bei uns in da Gegend hobns vor allem gega de Ungarn kämpft, beispisweis am Lechfeld. De letzte große Ritterschlacht bei uns in da Gegend is ausm Jahr 1322 überliefert. Des war de Schlacht bei Mühldorf/ Ampfing. Ritter warn aber ned nua Reiterkrieger, sondern des warn hochgebildete Leid.



Fast immer sans aus adlige Familien kemma und san scho ois 7-jährige Buam zu am Grafen oder König in Ausbildung gschickt wordn.

Do hobns kämpfa glemt, aba a danzn, schreiben, lesn, unterschiedliche Sprachn und via ma se benimmt.


Mit 14 Jahr sans Knappn wordn. Se warn oiso Ritterlehrling.



Wenns mit 21 Jahr oiss kinna hobn, gscheid und stark warn, danns sans zum Ritter gschlogn worn.

Da ganze Stoiz vo so am Ritter, war sei Pferd. Stark hods sei miassn, weil a so al Ritter mit Rüstung über 100 Kilo gwogn hod.

Ritterturniere wie z`Kaltenberg hods friara aa schon gebn. Des war aufregend fias Volk, weils ja no koan Fernseher gebn hod und de Ritter hobn in friedliche Zeitn fian Ernstvoi übn kinna.



Ihr hobts scho gmerkt, dass i imma nua vo de Buam schreib.

A Madl hod damois ned vui zum sogn ghobt.
Deandl hobn erst doa miassn,
wos da Babba sogt und
dann wos eana Mo sogt.

De meistn san scho mit
14 Jahr vaheirat wordn!
Madl warn fian
Haushoit, fia de
Kinda und zum
schee sei do.



Aber es hod Ausnahmen gebn:
De Jeanne d'Arc oder deitsch Johanna von Orléans war a waschechte
Ritterin und is de Nationalheldin vo de Franzosn wordn.

De Ritter warn ganz vornehme Herrn. Es hod nämlich an Ritter –
Ehrenkodex gebn. Des warn Regeln, an de se jeda Ritter hoidn hod
miassn.

I schreibs da auf, dann konnst deine Eltern
oda Oma und Opa frogn, wos des hoäßt.
Zur echtn Ritterlichkeit hod ghört:
Demut, Würde, Freundlichkeit,
seelische Festigkeit, Höflichkeit,
Tapferkeit, maßvolles Leben,
Zurückhaltung, Großzügigkeit,
hingebungsvolle Liebe,
Beständigkeit, Treue,
Anstand.

Des oiss san Sachan,
de aa heid no richtig
wichtig san, wenn ma a
guada Mensch sei wui.

De Ritterlichkeit wirkt bis heid
no noch. De Hilfsorganisationen
Malteser und Johanniter, san oide Ritterorden,
oiso Rittergemeinschaften, de aa heid no Menschn helfan und
unterstützen.

Es wearn aa no Leid zum Ritter gschlogn. De miassn aba ned a so a lange
Ausbildung durchlaffa, sondern de hobn meistens wos richtig guads fia de
Gemeinschaft do.

Frauen de heid zum Ritter gschlogn werd'n hoäß'n Edeldamen.
Aba mitm Schwert aufm Pferd'l sitzn de heid nimma.



Wennst da des oiss ammoi in echt
oschaung mogst, dann konnst auf
a Ritterfest geh.

Des in Kaltenberg is recht groß,
aba es gibt a vui kleanare:



- ◆ Ritterfest Kapfenberg vom 22.06. bis 23.06.2024
- ◆ Mittelalterfest in Laufen an der Salzach vom 28.06. bis 30.06.2024
- ◆ Zeitreise Isen vom 05.07. bis 07.07.2024
- ◆ Burgfest Burghausen vom 12.07. bis 14.07.2024
- ◆ Mittelaltermarkt zu Fürstenfeldbruck vom 30.08. bis 01.09.2024
- ◆ Maxlrainer Ritterspiele vom 13.09. bis 15.09.2024
- ◆ Mittelaltermarkt Vaterstetten vom 03. bis 06.10.2024

Herausgeber und Verleger:

Förderverein Bairische Sprache und Dialekte e.V.
Salzburger Str. 62a, 83435 Bad Reichenhall
Telefon: 08651-7680098
E-Mail: info@fbsd.de
Internet: www.fbsd.de

Bild, Grafik und Text:

Birgit Hackl, Baldham
Claudia Geisweid, Altomünster